



IROMAG

Odlazni studenti



U OVOM BROJU

**EKONOMSKI FAKULTET:
PREDSJEDNIK UPRAVE SPARKASSE
BANK ODRŽAO PREDAVANJE**

**STUDENTI TURIZMA I PRAVNOG
FAKULTETA POSJETILI ARHIV HNK-A**

**PREDAVANJE O OBNOVLJIVIM
IZVORIMA ENERGIJE**

SPORTWELL ADRIA

**SEDMICA MEĐUNARODNE
SARADNJE 2026**

**UZBUDLJIV LET U
POSLOVNI SVIJET**

by IROUNMO

Dr. sc. Amir Softić, predsjednik Uprave Sparkasse Bank, sa svojim saradnicima posjetio je Ekonomski fakultet Univerziteta „Džemal Bijedić“ u Mostaru, gdje je održao predavanje na temu uticaja kreditnih i ESG rizika na ekonomski rast i razvoj. Kroz izlaganje o ESG tranziciji, zelenoj ekonomiji i regulatornim okvirima održivog razvoja, studenti su imali priliku steći uvid u način na koji klimatski rizici, posredstvom ekonomskih prenosnih mehanizama, direktno utiču na finansijski sektor, kreditne politike i poslovanje savremenih kompanija. Poseban fokus predavanja stavljen je na 17 ciljeva održivog razvoja definisanih u Agenda 2030, s naglaskom na značaj mjerenja CO2 otiska, primjenu CBAM regulative Evropske unije, kao i potrebu usklađivanja poslovnih modela kompanija sa zelenim standardima i principima održivog poslovanja. Govoreći o budućnosti bankarskog sektora, dr. sc. Softić istakao je da Sparkasse Bank svoje poslovanje ne zasniva isključivo na kreditnim aktivnostima, već na izgradnji dugoročnih partnerskih odnosa sa klijentima i potencijalnim investitorima kroz razvoj finansijske pismenosti, unapređenje digitalnih kanala i kontinuirane edukativne procese. Naposljetku, prof. dr. Goran Ćurić, dekan Ekonomskog fakulteta Univerziteta „Džemal Bijedić“ u Mostaru, zahvalio se gostima na posjeti i istakao značaj povezivanja akademske zajednice i bankarskog sektora, ohrabrivši studente da stečena znanja primijene u razvoju održivih ekonomskih inicijativa i profesionalnih karijera u savremenom bankarskom sektoru.

STUDENTI TURIZMA I PRAVNOG FAKULTETA POSJETILI ARHIV HNK-A

By IROUNMO

Studenti Studija turizma i Pravnog fakulteta posjetili su Arhiv HNK u ponedjeljak, 11. maja 2026. godine, u pratnji viših asistentica Amne Mustafić Grebo i Lejle Škaljić Tanović. Tokom posjete studenti su se detaljnije upoznali s radom i značajem ove institucije. Zaposlenici Arhiva upoznali su studente s njegovom društvenom ulogom kao institucije specijalizirane za prikupljanje, čuvanje i zaštitu pisane kulturne i historijske baštine. Objasnili su način funkcionisanja i aktivnosti Arhiva, te predstavili procese evidentiranja, istraživanja i naučne obrade arhivske građe. Posjeta je protekla u interaktivnoj i edukativnoj atmosferi, a studenti su postavljanjem pitanja dodatno proširili svoja znanja o značaju arhivske djelatnosti.



PREDAVANJE O OBNOVLJIVIM IZVORIMA ENERGIJE

By IROUNMO

U amfiteatru Mašinskog fakulteta Univerziteta „Džemal Bijedić“ u Mostaru, 14. maja 2026. godine, održano je predavanje na temu „Proizvodnja energije iz obnovljivih izvora u zakonskom okviru EU i FBiH“. Predavanje je održao Armin Đuliman, dipl. ing. mašinstva, stručni saradnik za mašinsku fazu te istraživanje i razvoj u organizaciji Operator za obnovljive izvore energije i efikasnu kogeneraciju. Tokom predavanja studenti su imali priliku upoznati se sa regulatornim okvirom Evropske unije u oblasti upravljanja energijom, kao i sa odredbama novog Zakona o korištenju obnovljivih izvora energije i efikasne kogeneracije Federacije Bosne i Hercegovine. Posebna pažnja posvećena je temama poput prosumera, zajednica obnovljive energije, aukcija za obnovljive izvore energije te drugim aktuelnim pitanjima vezanim za energetska tranziciju i održivi razvoj. Predavanje je studentima pružilo uvid u savremene trendove i zakonske okvire koji oblikuju sektor obnovljivih izvora energije, te omogućilo bolje razumijevanje izazova i mogućnosti u ovoj oblasti.



SPORTWELL ADRIA

By IROUNMO

Od 15. do 19. maja 2026. godine Odsjek za kineziologiju Univerziteta „Džemal Bijedić“ u Mostaru ugostio je 30 studenata sa nekoliko različitih univerziteta iz Italije. Posjeta je realizovana u okviru Erasmus+ Blended Intensive Programme (BIP) SportWell Adria, u saradnji sa mrežom UNIADRION Italy. Učesnici su učestvovali u interaktivnim radionicama, predavanjima i sportskim aktivnostima, kroz koje su istraživali značaj sporta i zdravih životnih navika. Poseban fokus bio je na fizičkom i mentalnom zdravlju, pravilnoj ishrani, oporavku te prednostima aktivnog načina života. Program je omogućio razmjenu iskustava između studenata i akademskog osoblja, interkulturalno učenje te izgradnju profesionalnih i ličnih kontakata kroz zajedničke aktivnosti i timski rad. Okupljanjem učesnika iz različitih akademskih i kulturnih sredina, SportWell Adria program je dodatno ojačao međunarodnu saradnju i promovisao ulogu sporta kao alata za obrazovanje, zdravlje i društvenu inkluziju.



SEDMICA MEĐUNARODNE SARADNJE 2026

By IROUNMO

Od 18. do 22. maja 2026. godine, Univerzitet je u okviru Sedmice međunarodne saradnje bio domaćin predstavnicima partnerskih univerziteta u okviru Erasmus+ KA171 programa. Niz edukativnih, kulturnih i interaktivnih radionica predstavio im je historiju i kulturu Mostara i BiH. Program je započeo u ponedjeljak registracijom učesnika i obilaskom univerzitetskog kampusa. Studenti prve godine Studija turizma, Emana Tabaković i Armin Vuk, učesnicima su predstavili Univerzitet i njegove sadržaje. Aktivnosti su potom nastavljene na Nastavničkom fakultetu, gdje su održani kurs bosanskog jezika, prezentacija videa o Kancelariji za međunarodnu saradnju, koji su napravili studenti Ekonomskog fakulteta, i prezentacija mreže UniAdrion Italy. Drugog dana Sedmice međunarodne saradnje Univerzitet je ugostio predstavnike Univerziteta u Sarajevu. U okviru programa na Agromediteranskom fakultetu održana je promocija knjige „Interculturally Yours“ autora Emrea Sevena. Dio promocije obuhvatio je i sadnju drveta u sklopu projekta „The Intercultural Forest Project“, nakon čega je uslijedila radionica posvećena interkulturalnosti koju je vodio autor knjige. Nakon zvaničnog programa učesnici su upoznali Mostar kroz organizovanu turu grada koju su vodili studenti Studija turizma. Treći dan bio je posvećen lokalnoj kulturi i fizičkoj aktivnosti. Učesnici su naučili pripremati tradicionalno hercegovačko jelo – kureljaču. Nakon kulinarskog dijela programa organizovane su male olimpijske igre na sportskim terenima Univerziteta, koje su vodili viši asistent Amel Jazvin, prorektor za međunarodnu saradnju prof. dr. Rijad Novaković i studenti Odsjeka za kineziologiju. Program je završen zajedničkim druženjem i degustacijom pripremljenih jela. U četvrtak su učesnici Sedmice međunarodne saradnje prisustvovali aktivnostima organizovanim u okviru Sedmice međunarodne saradnje na Univerzitetu u Sarajevu. Posljednjeg dana programa održano je predavanje o stećcima koje je realizovao prof. dr. Adis Zilić, nakon čega je uslijedila radionica izrade stećaka kao suvenira, gdje su studenti Univerzitetskog studija dizajna interijera, pod nadzorom profesorice Lejle Isić Dizdarević, pomogli pri izradi suvenira. Ovogodišnja Sedmica međunarodne saradnje završena je dodjelom certifikata učesnicima, kao i karaokama tokom kojih su najuspješniji učesnici osvojili nagrade.





UZBUDLJIV LET U POSLOVNI SVIJET

By IROUNMO

Raiffeisen Bank je 12. maja 2026. godine na Ekonomskom fakultetu organizovala radionicu pod nazivom „Uzbudljiv let u poslovni svijet“. Događaj je održan u Amfiteatru 1, gdje su studenti imali priliku upoznati se s bankarskim sektorom, prvim koracima u razvoju karijere i savremenim poslovnim okruženjem. Događaj je otvorio dekan Ekonomskog fakulteta, prof. dr. Goran Ćurić, koji je uputio riječi dobrodošlice učesnicima. Tokom radionice studenti su istražili mogućnosti razvoja karijere, programe studentskog angažmana te stekli uvid u iskustva rada u dinamičnom poslovnom okruženju.



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
AMILA VRTIĆ

